

07 AUG 2002

MAHATHIR-INDONESIA/I

DR MAHATHIR BERLEPAS KE INDONESIA UNTUK LAWATAN DUA HARI

PETALING JAYA, 7 Ogos (Bernama) -- Perdana Menteri Datuk Seri Dr Mahathir Mohamad berlepas petang ini untuk lawatan kerja dua hari ke Bali, di mana beliau akan mengadakan perbincangan peringkat tinggi dengan Presiden Indonesia Megawati Sukarnoputri.

Beliau dijangka membincangkan isu-isu seperti mengambil pekerja-pekerja Indonesia, penghantaran pulang pekerja-pekerja haram, peluang-peluang pelaburan dan juga pertikaian sempadan.

Dr. Mahathir, yang berlepas dengan jet eksekutif pada pukul 1 petang, dihantar di pangkalan Tentera Udara Diraja di Subang di sini oleh Timbalan Perdana Menteri Datuk Seri Abdullah Ahmad Badawi dan beberapa orang menteri Kabinet lain.

Lawatan itu adalah sebahagian daripada dialog dan perundingan tahunan di kalangan pemimpin-pemimpin kedua-dua negara berjiran itu.

Malaysia dan Indonesia dijangka menanda tangani perjanjian-perjanjian mengenai beberapa isu, termasuk kerjasama mengenai perkara-perkara imigresen, penghantaran pulang pendatang haram Indonesia dan pembentukan Majlis Perniagaan Indonesia-Malaysia.

Kedua-dua pemimpin juga dijadual merasmikan bersama upacara mengenai pembekalan gas oleh Indonesia ke Malaysia. Projek itu adalah usaha sama antara Petronas Malaysia dan Pertamina Indonesia.

Dr Mahathir dijadual balik petang esok. -- BERNAMA

SHO MR SHY OS